

四庫全書

子部

欽定四庫全書

山堂肆考卷五十一

明 彭大翼 撰

臣職

總九卿

歷代沿革夏商九卿周六官是爲六卿又立少師少傅少保是爲三孤與六卿爲九漢正卿九太常光祿勳衛尉太僕廷尉鴻臚宗正大司農少府也亦謂之九寺大卿又置執金吾大長秋將作大匠共十二卿

梁天監中象四時置十二卿春卿太常宗正司農夏卿太府少府太僕秋卿衛尉廷尉大匠冬卿光祿鴻臚太卿即都水也後魏置六卿各有少卿北齊謂之九寺隋唐因之唐九寺一太常二光祿三衛尉四宗正五太僕六大理七鴻臚八司農九太府又九寺皆曰棘卿龍朔中凡卿皆加正字以別少卿咸亨初復舊除正字宋雖設九卿皆以爲命官之品秩而無職事元豐正名始有職掌中興以來裁冗職除太常大

理寺不罷外宗正以太常兼而衛尉併兵部太僕併  
駕部太府司農併戶部光祿鴻臚併禮部紹興中復  
置宗正太府司農餘遂廢漢韋昭釋名卿慶也言萬  
物皆慶賴之又卿章也言貴盛章著也

### 倡九牧

周書六卿分職各率其屬以倡九牧阜成萬民

### 參三公

說苑九卿者所以參三公也

建旛

周禮冬官司常掌九旗之名物及國之大閱贊司馬頒旗物王建太常諸侯建旗孤卿建旛

帶綬

東漢馬防位至九卿身帶三綬寵貴至盛也

六命

周禮春官典命掌諸侯之五儀諸臣五等之命王之三公八命其卿六命其大夫四命

九列

漢韋玄成傳恤我九列注云九列九卿也

辭高位

左莊二十二年齊侯使敬仲爲卿辭曰羈旅之臣敢辱高位以速官謗

治大官

國語晉悼公使張老爲卿辭曰臣不如魏絳之智能治大官若在卿位内外必平

進珪

莊子曰楚昭王進屠羊說以三珪之位三珪謂三卿皆執珪也

佩玉

東漢左雄言九卿位亞三事班在六官行有佩玉之節再登

史記濮陽段宏始事蓋侯信信任宏官亦再登九卿

四至

儒林傳前漢許商善算四至九卿又續漢書汲黯姊之  
子司馬安巧宦四至九卿

龜鈕

漢官儀卿秩中二千石孝武皇帝元狩二年令通官印  
方寸大小官印五分王公侯金二千石銀皆龜鈕

犀印

司馬彪漢書中二千石以下至四百石佩兩印皆以黑  
犀



藻衣

漢官儀衣裳公侯華蟲卿大夫藻火綬青地桃花三彩  
緹扇

續漢書卿以下有駢者緹扇汗青翅尾又初學記緹扇  
朱輪參差交映藻衣花綬焜燦生光

法河

春秋漢舍華三公象五嶽九卿法河海

括海

謝承後漢書李淑諫更始曰夫三公上應宿九卿下括  
河海

太常卿

歷代沿革舜命伯夷作秩宗夔典樂即太常之任也  
秦改曰奉常掌宗廟禮儀漢祖改曰太常以列侯忠  
孝敬謹者居之秩中二千石惠帝更名奉常景帝又  
曰太常王莽改爲秩宗梁加卿字曰太常卿北齊太  
常寺置卿及少卿丞各一人唐龍朔二年改爲奉常

光宅初曰司禮卿宋太常寺皆以禁林之長主判元  
豐正名始專其職按常典也常典三禮故曰太常或  
曰太常王者之旌有大事則建以行禮禮官奉持之  
故曰奉常又按史稱漢高祖拜叔孫通爲奉常賜金  
五百斤則奉常之名在漢初已沿秦制不特至惠帝  
始更名也太常寺曰容臺曰司禮寺又曰禮院

叔孫朝儀

漢叔孫通始起朝儀會長樂宮成諸侯皆朝謁者引以

次入殿門自侯王以下莫不震恐無敢失禮高帝曰吾  
今乃知皇帝之貴拜通爲奉常

桓榮師禮

東漢桓榮以少傅遷太常明帝尊以師禮甚見親重乘  
輿每幸太常府令榮東面坐設几杖會百官

論議伉伉

東漢劉愷論議常引正大義諸儒爲之語曰難經伉伉  
劉太常

德行堂堂

魏邢顒字子昂時人稱德行堂堂邢子昂文帝以爲太常

彊禦不奪

漢張奐字然明拜太常立節可否之間彊禦不敢奪也  
言行不玷

晉華表爲太常卿歷位忠恪清貧履道內正外順言行  
不玷

加賜穀帛

魏和洽爲太常清貧守分至賣田宅以自給明帝加賜穀帛

特賜牀席

晉賀循拜太常中宗踐祚下令曰循冰清玉潔行爲俗表位處上卿居身服物蓋身而已屋纔庇風雨孤常造其廬特賜六尺牀席褥并錢二十萬以表至德

驅千乘車

魏王朗遷太常行陵赤車千乘又唐太常表西京置一  
十二列首冠金吾東漢有三十九人多遷玉鉉戴玄冕  
之七旒驅赤車之千乘

設九部樂

唐封敎爲太常卿故事太常始視事庭設九部樂

怒妻干齋

應劭漢官儀北海周澤爲太常恒清齋遇疾妻憐其年  
老疲病窺內問之澤大怒以爲干犯齋禁掾吏叩頭爭

之不聽遂收送獄并自劾諺曰居世不諧爲太常妻一  
歲三百六十日三百五十九日齋一日不齋醉如泥既  
作事復低迷

選童按樂

唐王涯字廣津文宗時拜太常帝以樂府之音鄭衛太  
甚欲聞古樂命涯詢于舊工取開元雅樂選樂童按之  
命曰梨園樂上悅

還第攝事



晉太常王寶啟府舍窄狹不足移家母鍾年高違離靡寧乞還第攝事詔從之

臨軒作樂

晉蔡謨拜太常咸康四年上臨軒謨奏臨軒宜有金石上納焉臨軒作樂自此始

爲母導輿

唐崔邠字處仁爲太常卿故事太常始視事大閱四部樂都人縱觀邠乃自第去帽親導母輿都人榮之

爲帝賦詩

唐楊師道字景猷太宗時爲太常卿賜宴帝曰聞公每  
酣捉筆賦詩如宿構試爲朕賦之師道再拜少選輒成  
一坐嗟服

傳父業

東漢桓榮子郁傳父業亦爲太常初榮授朱普學四十  
萬言多浮辭郁省定爲十四萬言由是有桓君大小章  
句

陳母訓

北齊趙彥深拜太常卿不脫朝服先入見母跪陳幼小孤寒蒙訓至此

首九卿

漢官解語太常掌社稷郊時事重職尊故號九卿之首  
同六曹

唐崔日知遷太常卿以歷年久每朝士叅集常與尚書同列時人號爲尚書裏行一說宋朝太常在六曹尚書

之下與尚書丞郎同幕次故謂之尚書裏行

閒職

唐張瓌拜太常自謂閒職帝怒

清選

唐白居易制立國之本禮樂爲先今之太常兼掌其事  
歷代迄今謂之清選又李昉譚錄太常不是卿秘書不  
是監以其職品清重非他卿監比也

起望省樓

唐崔日知為太常卿恨不居八座乃起樓與尚書省相對人謂之崔公望省樓

對中華殿

唐令狐德芬為太常卿高宗坐中華殿問王霸孰先德芬對以任德不任刑為政以清心簡事為本帝悅厚賜之

布被瓦器

耆舊傳趙典為太常雖身處上卿而布被瓦器不異寒

素

銀章青綬

魏晉太常卿皆銀章青綬進賢兩梁冠絳朝服佩水蒼玉

以侍中出

魏城陽王徽與黃門侍郎徐紇毀侍中元順出爲太常卿順奉辭時紇侍側順指之曰此魏之宰嚭魏國不亡此終不死紇脅肩而出順叱之曰爾刀筆小才止堪供

几案之用豈應污辱門下歟我曩倫因振衣而起太后默然

以祭酒遷

唐元載秉政忌楊綰奏爲祭酒天下清議悉歸于綰乃遷綰爲太常充禮儀使郊廟禮儀綰振起之

宗儒懦怯

唐趙宗儒爲太常卿太常有師子樂非會期不作幼君荒誕於教坊牒取宗儒不敢違以狀白宰相宰相以爲

事在有司執守不合關白以宗儒懦怯不任事改太常少卿

彭年該洽

宋陳彭年博學於書史禮文尤所詳練嘗攝太常卿導乘輿誤行黃道上有司止之彭年正色回顧曰自有典故禮曹素畏其該洽不敢詰問

終無折衷

晉後畧成泰位至太常好生異議終無折衷



多所釐正

言行錄曾文宣公肇同知太常禮院公在職多所釐正  
上親祀皇地祇於北郊蓋自公發之

更作類禮

唐魏鄭公爲太常嘗以小戴禮綜彙不倫更作類禮一  
十篇帝美其書

進讀史記

宋劉敞判太常寺兼禮儀事上初即位有疾皇太后臨

朝疾愈乃歸政適有小人構二宮不歡諫者或訐而過直公謂當以義理感諷兩宮時進讀史記至堯授舜以天下公因諫說舜至側微堯禪以位非有他道惟其孝友之德光於上下上知其以諷諫也慈壽聞之亦大喜

### 諫徵散樂

初齊高緯之世有魚龍山車等戲謂之散樂隋煬帝徵之太常卿高隸諫不聽退謂丞李懿曰周天元以好樂而亡殷鑒不遠

改定雅樂

宋太祖乾德二年以雅樂聲高近於哀思不合中和詔判太常寺和峴改定峴以王朴律準較洛陽司天臺影表石尺制律呂音始和暢

濮安典禮

宋英宗即位中書奏請尊濮安懿王禮詔令禮官檢詳典禮以聞范鎮時判太常寺上言漢宣帝于昭帝爲孫光武于平帝爲祖則其父容可稱皇考而議者尤非之

今陛下既考仁宗又考濮王則其失非特漢宣光武之比矣

溫成廟制

言行錄宋韓維知太常禮院先是溫成皇后立廟用樂公上疏乞詔有司議廟制以明陛下不私後宮之意

議講官禮

東都事略熙寧初知太常禮院劉攽會建言講官願得坐講下太常議攽曰侍臣應對顧問日欲討論不可安

坐自若避席立語乃古今常禮時議者不一卒如放言

獻旋宮圖

宋朝太常寺音律官田琮以上所御九絃琴五絃阮并  
協律以旋宮相生之法畫爲圖獻上上善之

請專配上帝

宋趙君錫同知太常禮院時近臣有請英宗于明堂配  
昊天上帝及五帝君錫與禮官建言專配上帝以稱嚴  
父之意

論輕假中官

司馬光知禮院時中官凌允言死詔特給鹵簿公論名器不可假人允言近習之臣非有元勲大勞而贈三公給鹵簿其爲繁纓不亦大乎

太常少卿

歷代沿革周官小宗伯少卿之職即其任也秦漢無聞後魏太和初置少卿一人後周爲小宗伯景明初少卿爲第一清選以明禮樂兼天文陰陽者爲之隋

初置一人煬帝置二人唐武德置一人貞觀置二人  
龍朔改爲奉常大夫宋少卿無職事元豐正名始有  
職掌元祐元年呂純禮爲少卿時御史論純禮以門  
廕得官不可任奉常於是外補

奏括樂家子

隋煬帝以啟民可汗將入朝欲以富樂誇之太常少卿  
裴蘊希旨奏括天下前世樂家子弟皆爲樂戶其六品  
以下至庶人有善音樂者皆置太常帝從之于是四方

散樂大集京師

諷讓中書令

唐薛稷遷太常少卿會鍾紹爲中書令稷諷紹使讓因  
入言於帝曰紹本胥史素無才望今特以勲進師長百  
僚恐非朝廷具瞻之美帝然之遂許讓中書令

請輟遊幸

宋呂公著嘉祐中同判太常寺數言濮王在殯及請讌  
北使毋用樂上元輟遊幸廢溫成皇后廟多見聽用



議定配享

宋秦觀撰鮮于公行狀鮮于侁爲太常少卿會議神宗配享功臣或欲用王荊公吳文惠公者公曰富文忠勲德天下具知宜配享其議遂定

增損雜樂

唐韋萬石上元中遷少卿當時郊廟樂調及讌會雜樂皆萬石增損之時謂稱職

叅定雅樂

唐張文收善音律太宗將創制禮樂召文收於太常令與少卿祖孝孫叅定雅樂

識錞于樂

北史魏斛斯徵字士亮爲少卿博覽羣書尤精三禮兼解音律自魏雅樂久廢徵博采遺逸其樂始備樂有錞于者近代絕無此器或自蜀得之皆莫識徵見之曰此錞于樂也遂依千寶周禮注爲芒筒振之其聲極清衆乃嘆服

辨阮咸器

唐元澹字行冲景雲中授少卿行冲以系出拓跋恨史  
無編乃撰魏典二十篇學者尚之有人得銅器似琵琶  
人莫能辨行冲曰此阮咸所作也雅樂家遂謂之阮咸  
閑廐稍備

唐姜時轉太常少卿時國馬缺乏請以詔書市馬六胡  
州卒得馬三千閑廐稍備

經學尤長

唐鄭肅元和中轉太常少卿肅能爲古文而尤長于經學博士以下必就肅決之據經條答

聿脩却紬

職官分紀齊太常少卿袁聿脩與巡省河南兗州刺史邢劭爲故舊劭嘗於省中呼聿脩爲清郎至是送紬爲信聿脩不受與劭書曰瓜田李下古人所謹劭報書曰昔爲清郎今爲清卿矣

介夫賜錦

唐馮定字介夫爲少卿文宗每聽樂詔奉常習開元霓裳羽衣舞以雲韶樂和之舞曲成定總樂工閱於庭定立於其間文宗以其端嚴若植問知其姓氏因吟其送客西江詩賜以禁中瑞錦詔悉所著以上遂遷諫議大夫

專任禮樂

曲阜集溫益除太常少卿制奉常正卿蓋不常置則爲之貳者專任禮樂之事

特賜金紫

宋英宗賜少卿孔叔暮金紫叔暮以勞當遷上不欲以卿監當筦庫之務故有賜後遂爲例

使教女樂

唐太宗使少卿祖孝孫以樂律授宮中音樂伎不進數被讓王珪與溫彥博同諫曰孝孫脩謹士陛下使教女樂又責謂之臣竊以爲不可

請復太祝

宋鮮于侁字子駿元祐初爲少卿會罷太祝侁上言神考釐定官制太常設奉禮太祝誠不可廢請乞復置仍請自朝廷選有學行者授之職詔從之

### 太常寺丞

歷代沿革奉常秦官有丞漢多以博士議郎爲之後漢諸丞皆掌行禮及總署曹事歷代皆有之唐因隋太常丞從五品凡享太廟則脩七祀于西門之內分判寺事宋皇祐中詔差禮官一員兼丞事建炎三年

省紹興三年復置

銅印黃綬

東漢諸丞皆銅印墨綬宋太常視尚書則銅印黃綬齊  
梁墨綬

介幘皂衣

晉宋九卿置丞進賢一梁冠介幘皂衣

職掌陵廟

漢韋弘爲太常丞其父賢以弘當爲嗣太常丞職掌陵



廟煩劇多過敕弘自免弘懷嫌不去官及賢疾篤弘果坐廟事繫獄論不得嗣而立玄成按弘乃賢長子玄成其次子也

巡視壇壝

太常丞一人以禮樂久次官高者充掌檢校樂器巡視壇壝

贊郊禮

胡文恭行王珪制丞諸樂卿贊我郊禮

記夷曲

唐天后時李嗣真爲太常丞聞東夷三曲一遍授胡琴彈之無一聲遺忘

數言得失

漢谷永爲太常丞數上疏言得失

不妄進取

宋陳文惠公堯佐居官不妄進取爲太常丞十三年不遷官

定廟議

陶氏家傳陶覆之爲丞凡宗廟疑議多所決定時人爲之語曰定禮決疑問陶覆之

論聖學

宋李浩孝宗即位以太常丞召至闕首論聖學以爲人主務學則其餘嗜好無間而入矣

推高

職林溫輔國居鄴薛嵩薦於朝授太常丞輔國一謝嵩

即去屏處郊野世推其高

畏直

宋石待問眉山人士少以詩賦名累官至太常丞時丁謂畏其直錢易竒其文楊億李諤服其議論

請復廟享

宋范希純爲太常丞舊制太廟薦享逐室設常食一牙盤元豐四年奏罷之希純奏請復舊制易其名曰薦羞  
詔閱工器

宋紹興十一年時太樂廢詔太常丞周執羔輯舊聞閱  
工器而樂始備

太常博士

博士秦官也漢叔孫通爲博士定禮制自此博士掌  
通古今員多至數十人後漢置十四人魏晉掌引導  
乘輿王公以下應追謚者則博士議之隋四人唐因  
之甚爲清選資位與補闕同掌撰五禮儀注及贊相  
祭祀定諡謚等事宋祥符中置二員後加至四員中

興初太常寺省丞簿而博士如故紹興以後增減不  
一大元太常寺亦置博士

正陰陽書

唐呂才累遷太常博士太宗病陰陽家所傳書多謬僞  
淺惡世益拘畏命才與宿學老師刪落煩訛共加刊正  
掇可用者爲五十二篇合舊書四十七凡百篇詔頒於  
天下才又造方域圖

議郊祀禮

唐裴守貞授太常博士高宗將封嵩山詔禮官議射牲  
守貞曰據周禮郊祀天地自射其牲漢武帝封泰山令  
儒生射牲至于餘祀無射牲之文

諫后不當亞獻

唐紹爲太常博士中宗時始郊祭祀欽明知韋后能制  
天子欲迎諂之即奏以皇后亞獻安樂公主終獻紹以  
爲非引經固爭詔禮官集議衆皆曲意同徇欽明紹獨  
抗言不可諸儒壯其節

論后不宜并安

唐陳正節遷太常博士玄宗奉昭成皇后祔睿宗室而欲以肅明皇后并安焉正節奏言廟必有配一帝一后禮之正也昭成皇后有太妣之德升配睿宗肅明皇后既非子貴宜在別廟周人奏夷則小呂以享先妣姜嫄也以生后稷故特立廟曰閼宮晉簡文帝鄭宣皇后不配食築宮于外以歲時致享肅明準同姜嫄與晉宣后納主別廟時享如儀



爲曲臺禮

唐王彥威淹識古今典禮求爲太常散吏采隋唐禮條次彙分號元和新禮以進上乃拜博士又識林云彥威爲曲臺新禮二十卷又採元和已來王公士民昏祭喪塋爲續曲臺禮三十卷

撰明堂儀

唐韋叔夏爲太常博士撰立明堂儀注衆咸推服

榜逐孟貞

陸亘爲太常博士寺有祀生孟貞久于其事凡吉凶六儀祀官不能決者率訪于貞元和中冊立太子貞倚其能參議偃蹇亘遂榜逐之胥吏失色

請移鄭言

唐大中中鄭朗拜相以左拾遺鄭言昔居幕中請移爲太常博士至十一年崔慎由秉政復以左拾遺杜蔚爲博士蓋蔚亦慎由舊寮也遂爲故事

補容典

唐僖宗時商盈孫爲博士喪亂之後制度凋紊追補容  
典皆盈孫折衷又昭宗將謁郊廟有司不知樂懸制度  
盈孫按周法以筭數

考功行

晏類要令狐楚曰叔孫通起帝典于桴鼓之中自此以  
還鴻生碩儒若賈誼董仲舒公孫弘罔不以此進元帝  
詔丞相御史明于古今通達國體者徵爲博士今行能  
在臣<sub>闕</sub>者知其班末祿寡莫不以博士爲愧臣獨以爲

榮詳曲臺之儀法考庶僚之功行太常三卿始蒞事博士無叅集之禮

賜金紫

南唐高越爲博士淮上兵起召賜金紫俾專掌戎府檄書

賜書扇

九朝通略宋米友仁爲博士進楚山清曉圖既退賜御書畫扇各二遂除春官外郎人以爲榮

安民力學

東都事畧常安民字希古幼穎悟力學舉進士爲成都教授代還上書論強國之本曰勸忠厚勵名節元祐公卿薦其才召爲太常博士

倪濤能文

事略濤字巨濟能文有操履舉進士爲太常博士

撰進禮書

元祐五年太常博士陳祥道以所撰禮書進給事中范

祖禹言其精密過於聶崇義詔兩制詳之

上言時事

宋劉庠遷博士英宗以災異求直言庠上書論時事遂除監察御史裏行

議論激切

張九成除博士陞對以正心術用人材收兵權爲說議論激切上深獎嘆

進退閒雅

宋和峴字晦之凝子也授太常博士從祀南郊峴贊導  
乘輿進退閒雅太祖謂近侍曰誰氏之子何相禮之明  
辨乎左右即以峴閥閱對尋拜刑部員外郎兼判太常  
寺

作千字文

崇寧中米芾為博士奉詔以黃庭堅小楷書作千字文  
以獻

定五禮式

元豐初除何洵直博士掌講定五禮儀式有改革據經  
審議

宜諡文禮

宋王居正字剛中爲博士朝廷方懲王氏邪說之禍會  
故相韓忠彥請諡公曰熙寧初闢近臣坐講之請有功  
名教宜諡曰文禮而韓氏子乃以故事未有以禮爲諡  
者謁宰相求改公卒不改

改封衍聖



宋祖無擇爲博士至和二年詔封孔子孫宗愿爲文宣公無擇言唐開元中謚孔子爲文宣王又以其孫爲文宣公是以祖之謚而復加于後嗣也遂改封宗愿爲衍聖公

光祿卿

歷代沿革光祿卿漢官也初秦置郎中令掌宮殿門戶及主諸郎之在殿中侍衛者故曰郎中令漢武帝更名光祿勳獻帝又爲郎中令魏文帝又更爲光祿

勲梁加卿字除勲字曰光祿卿北齊兼掌穀膳隋則  
全掌穀膳不復掌宮殿門唐龍朔二年改爲司宰卿  
咸亨初復舊光宅初改爲司膳卿神龍初復舊

孟宗清純

孟宗爲光祿勲大會宗少飲酒偶有強者飲一杯即吐  
傳詔司察宗吐闕飯察者以聞上乃嘆息曰至德清純  
如此

杜林周密

漢書杜林字伯山爲光祿勳內奉宿衛外總三署周密敬慎選舉稱平數薦名士按漢官儀郎中令屬官五官中郎將右中郎將號曰三署

異政被徵

東漢劉昆初爲江陵令縣有火災昆向叩頭多降雨止風後爲弘農太守虎皆負子渡河光武聞而異之徵爲光祿勳帝問昆曰前在江陵反風滅火後守弘農虎北渡河行何德政而致是乎昆對曰偶然耳帝嘆曰此長

者之言也顧命書諸策

忠言見采

東漢桓帝時封賞踰制內寵猥盛光祿勳陳蕃上疏言之帝采其言出宮女五百餘人封侯者降爲鄉侯

安世隱過

漢張安世字孺子爲光祿勳郎有醉小便殿上者主事白行法安世曰何以知其非覆水漿耶如何以小過成人之罪郎有淫官婢者婢兄自言安世曰奴以恚怒誣

我衣冠告署捷奴其隱人過皆此類也

王肅知變

魏王肅字子雍爲光祿勳時有一魚長尺餘集武庫之屋有司以爲吉祥肅辨之曰魚生於泉而見於屋鱗介之物失其所矣邊將殆有棄甲之變乎其後果有東關之敗

每見則拜

魏志常林徙光祿勳晉宣王以林爲鄉邑耆老每見則

爲之拜或謂林曰司馬公貴重君宜且止之林曰司馬公自欲敦長幼之節以爲後生之法非我所能制也言者慙而蹢躅

不見爲恨

魏鄭裒爲光祿勳母丘儉作亂景帝自征之百官祖送裒疾不在會上謂王肅曰唯不見鄭光祿爲恨裒聞乃輿疾追上上笑曰固知卿必來也遂與同載問以計謀甚見禮重

輕財好義

漢楊惲爲光祿勳惲輕財好義殿中稱其公平然伐其行能好發人陰伏由是多怨卒免爲庶人

修己守道

晉成帝顏含爲光祿勳郭璞嘗欲爲之筮含曰年在天位在人修己而天不與者命也守道而人不知者性也自有性命無勞著龜

衛尉卿

歷代沿革衛尉秦官也掌宮門衛屯兵漢景帝更名  
中大夫令尋復爲衛尉自王莽及後漢初並省之至  
獻帝復置梁曰衛尉卿唐武德初省之貞觀初復置  
龍朔二年改爲司衛卿咸亨初復舊光宅初又改爲  
司衛卿神龍初復舊

交戟

漢武帝栢梁詩衛尉曰周衛交戟禁不時

審印



胡廣注解詁凡入宮中者皆施籍於掖門按其姓名當入者本官長吏爲之啟傳審其印信然後受之

身無所惜

東漢陰興爲衛尉每將士遠征身行勞問無所愛惜

家常不克

吳嚴畯爲衛尉祿賜皆散之親戚知故家常不克

八屯

東漢張衡西京賦徼道外周千廬內附衛尉八屯警夜

巡晝又白帖官尊九寺職重八屯馬光以忠直見親趙  
嘉以周密獲寵

千列

班固西都賦周廬千列徼道綺錯

廢職

漢揚雄衛尉箴齊桓怵惕宿衛不勅門非其人戶廢其  
職曹子標劒遂成其詐軻挾匕首衛人不寤二世妄宿  
敗于望夷閭樂矯詔戟者不推尉臣司衛敢告執維

棄官

唐中宗神龍中以楊元琰爲衛尉卿先是元琰知武三思浸用請棄官爲僧上不許敬暉聞而笑之元琰曰功成名遂不退將危此由衷之請非徒然也及暉等得罪元琰獨免

宗正卿

歷代沿革宗正卿周官也周受命封建宗盟始選其宗中之長而董正之謂之宗正成王時彤伯入爲宗

正掌王親屬是也漢平帝更名宗伯王莽改爲秩宗  
東漢復爲宗正晉曰太宗正梁曰宗正卿北齊又加  
大字隋又除之唐龍朔二年改爲司宗卿光宅初改  
爲司屬卿宋宗正寺判寺事二人以宗姓兩制以上  
充元豐改制所掌與舊畧同掌序宗派紀屬籍以昭  
穆而定親疎凡修纂圖籍牒譜其別有五曰玉牒曰  
屬籍曰宗藩慶系錄曰僊源類譜曰僊源積慶圖

劉平仁孝

東觀漢紀劉平字公予以仁孝著聞永平三年拜爲宗  
正

劉向忠直

漢書劉向字子政本名更生元帝時蕭望之周堪薦向  
宗室忠直明經有行拜爲宗正

清秩

曲阜行王柄制宗正地嚴秩清儒者之職也

冷卿

鄭氏譚綺錄宗正曰秩宗又杜子美別李入詩丈人領  
宗卿蘇東坡詩宗正爲冷卿

劉般竭忠

東觀漢記劉般字伯興代名忠孝在朝竭忠盡節夙夜  
不怠建初元年拜爲宗正

李璆薦善

唐宗室李璆天寶初拜宗正卿性友悌聰敏宗子有一  
善無不薦延

循禮法

宋趙仲忽入判大宗正事徽宗賜之甲第及建賢懋功之閣以示寵仲忽鯁亮端毅動循理法立宗司法式

第賢能

唐元微之行李從易制昔劉氏子孫在屬籍者十餘萬唐有天下二百年伯仲叔季幼子童孫可勝道哉第其賢能以次序昭穆皆吾宗寺之職也

忠厚篤重

山公啟事晉羊祜忠厚篤重然不長理劇宗正卿秩不知可轉作否

忠懿清和

後魏職令宗正卿請用忠懿清和識叅教典先取皇宗無則用庶姓

杜銓瓌雅

後魏世祖謂崔浩曰天下諸老何處爲最欲取一人以爲宗正浩曰中書博士杜銓合爲諸社之最即命召之



及見器貌瓌雅世祖謂浩曰此真吾所欲也拜爲宗正  
竇誕昏謬

唐竇誕爲宗正卿太宗與語昏謬失對乃下詔曰誕比  
衰耗不能治事朕知而用之是謂不明其以光祿大夫  
罷之

唐取遠藩

唐杜牧除李文舉制取自遠藩擢爲宗正

魏取同宗

後魏宗正卿多取同宗

各擇一人

宋仁宗景祐三年用太祖太宗之後屬近行尊者各一人知太宗正事於是以皇兄允讓皇姪守節爲之仍賜襲衣金帶鞍馬時宗室子孫衆多聚居大第故於祖宗後各擇一人令敦睦之違失則糾正焉

不隸六曹

元豐官制行詔大宗正司不隸六曹大宗正以宗室團

練使以上有德望者爲之

重脩圖籍

宋真宗實錄趙安仁謚文定兼宗正卿以安仁舊德大僚特令知寺自是多所規制重脩玉牒屬籍

詳定規式

宋治平元年判大宗正事趙允弼詳定皇親讀書賞罰規式詔依所定次第施行

山堂肆考卷五十一

欽定四庫全書

子部

山堂肆考卷五十二

詳校官中書臣孫沅

主事臣祁韻士覆勘

總校官降調編修臣倉聖脉

校對官主事臣陳墉

謄錄監生臣金特

欽定四庫全書

山堂肆考卷五十二

明 彭大翼 撰

臣職

太僕卿

歷代沿革周禮太僕掌王之服位出入王之大命建  
路鼓于大寢門之外而掌其政王出入則自左馭而  
前驅尚書稱穆王命伯冏為太僕正是也以其為衆  
僕之長故曰太僕秦因之掌輿馬歷漢魏及晉西朝

咸置至東晉元帝省之後復置成帝又省之併入宗  
正蓋有事郊祀則權置畢則省宋齊因之梁曰太僕  
卿唐初因之龍朔二年改為司馭寺卿曰司馭卿光  
宅初改為司僕寺卿曰司僕卿

奉車

漢夏侯嬰為沛公太僕常奉車

馭駕

續漢書太僕周官秩中二千石掌車馬天子出入大駕

則奉小駕則馭

數馬對君

漢石慶為太僕御出上問車中幾馬慶以策數馬舉手  
曰六馬

養馬濟事

晉郭展為太僕心精于畜養是以馬充盛其後伐吳得  
以濟事

次孫清庶

東漢祭彤字次孫遵從弟也膂力過人入為太僕清廉  
有道在遼東幾三十年衣無兼副明帝美其清約賜之  
衣備什物嘗從帝至魯帝入孔子廟至子路室曰此太  
僕之室也太僕吾之禦侮

國泉恭儉

魏國泉字子尼為太僕布衣蔬食祿賜俱散故舊宗族  
以恭儉自守

大理卿



歷代沿革大理古官也舜命皋陶作士正五刑秦置  
廷尉漢景帝改曰大理武帝又曰廷尉哀帝又曰大  
理王莽改曰作士東漢又曰廷尉晉宋齊並因之梁  
曰廷尉卿又曰秋卿北齊為大理卿隋置大理寺唐  
因之卿一人少卿二人龍朔二年改曰詳刑寺咸亨  
初復舊光宅初改曰司刑寺神龍初復舊宋大理寺  
以京朝官一員或二員判寺事大理寺曰大棘又曰  
棘署又曰北寺

行法以公

家語季羔為衛士師別人之足俄而衛亂季羔逃別者  
守門謂羔有缺有竇有室乃入焉既罷羔問曰吾親別  
子之足而子逃我何也別者曰曩者君理人以法令先  
君後臣欲臣之免臣知之臨當論刑君愀然不樂見于  
顏色臣又知之君豈私臣哉孔子聞之曰善哉為吏其  
用法一思仁恕則樹德加嚴威則樹怨公以行之其子  
羔乎

# 掌法務寬

東漢郭躬字仲孫為廷尉家世掌法務在寬平及條諸重文可從輕者四十一事奏之多所生全其子鎮自廷尉左監遷廷尉凡郭氏為廷尉者七人

## 石奢守法

新序楚昭王使石奢為大理於是道有殺人者奢追之即其父也遂返於廷曰殺人者父也以父成政不孝不行君法不忠弛罪廢法而伏其辜僕之所守也伏斧鑕

命在君君曰追而不及庸有罪乎石奢曰不私其父非孝也不行君法非忠也以死罪生非廉也君舍之上之慮也臣不敢失法下之行也遂刎頸而死於廷

李離伏罪

晉文公時李離為大理過聽殺不辜自繫曰臣之罪當死文公曰官有上下罰有輕重是下吏之罪也非子之過也離曰臣居官為長不與下吏議位受爵為多不與下吏分利今過聽殺無罪臣之罪當死遂伏劍而死

斷法稱平

東漢張禹為北曹吏斷法稱平明帝以其達法理有張  
釋之之風起拜廷尉

奉法持正

唐鄭善果為大理卿奉法持正風績顯于公卿

朱博耳剽

漢書朱博遷廷尉恐為官屬所誣乃以意覆獄召見正  
監典法掾吏謂曰廷尉本起於武吏不明法律幸有衆

賢亦何所憂然廷尉治部斷獄以來二十年亦獨耳剽  
日久三尺律令人事出其中試與正監共撰前代決事  
吏議難知者數十事持問廷尉將為諸君覆之正監以  
為博乃強意未必能然即共條白焉博皆召掾吏為平  
處其輕重十中八九官屬咸服

孔坦面決

鍾離岫會稽後賢記晉孔坦遷廷尉卿獄多繫囚坦到  
官躬執詞狀口辨曲直小大以情不加楚撻每臺司錄

獄無所顧問皆面決當時之事

斷獄流涕

東漢傳賢字仲舒遷廷尉刑法務從輕恕每冬至斷獄  
遲回流涕

斷囚垂泣

見冬月

定國不寬

漢于定國字曼倩為廷尉其為人卑恭尤重經術決獄

平恕務在哀鰥寡朝廷稱之曰張釋之為廷尉天下無  
冤民于定國為廷尉人自以不冤

唐臨無冤

唐唐臨字本德京兆人為大理卿唐高宗親錄死囚前  
卿所斷者悉號叫稱冤臨所入者獨無言帝怪問狀囚  
曰唐卿所斷本自無冤又何言上嘆曰治獄者不當如  
是耶

結王生襪



漢書王先生者善黃老言張釋之召居廷中公卿盡會  
廷中立王生襪解顧謂釋之為我繫襪釋之前跪而繫  
之既退或讓王生曰何辱張廷尉乎王生曰廷尉方為  
天下名臣吾聊使結襪以重之

遺何子衣

孔帖唐張道原拜大理卿何稠得罪籍其家屬賜羣臣  
道原曰禍福無常安可因已之泰利人之否取其子女  
以為僕妾豈仁者之心皆捨之一無所取更資以衣食

遣之

不欲開怨

東漢范堅為廷尉奏主典吏邵廣盜官印依律棄市廣  
息雲宗二人自願沒官為奴婢以贖父罪尚書議可堅  
駁之曰此為施一恩於今開萬怨於後顯宗從之卒正  
廣刑

務在原情

隋文帝朝大理卿薛胄與少卿趙綽俱稱平恕然胄務

原情而綽惟守法

賓客填門

漢下邳翟公方進為廷尉賓客填門及廢門可設崔羅  
及復為廷尉客欲往公大署其門曰一死一生乃知交  
情一富一貧乃知交態一貴一賤交情乃見

法律名家

雍嶠後漢書河南吳雄字季高以明法律桓帝時自廷尉  
致位司徒初雄少時家貧母死葬人所不封之地喪事

趙辨不卜時日巫皆言其當族滅而雄與子祈孫恭三世為廷尉以法律名家

議絕妻

漢書孔光為廷尉時定陵淳于長坐大逆誅長少妻乃始等六人皆以長事未發覺時棄去或更嫁及長事發丞相翟方進等議乃始等於法無以解論光獨以為夫婦之道有義則合絕義則離乃始等或去或嫁則義已絕而欲以為妻論殺之名不正不當坐有詔以光議為

定

決分子

漢書范延壽宣帝時為廷尉時燕趙之間有三男共娶一妻生四子長各求離別爭財分子至聞于縣縣不能決斷讞之于廷尉於是延壽決之以為悖逆人倫比之禽獸生子屬其母以子竝付母尸三男于市奏免郡太守令長等無帥化之道天子可其言一說斷獄者是黃霸

每附輕典

東漢陳寵代郭躬為廷尉每附輕典務從寬恕濟活者衆史讚曰陳郭主刑人賴其平

遣決疑事

唐張文瓘為卿至官旬日遣決疑事四百條人無怨言高宗上元二年八月以文瓘為侍中囚聞改官皆慟哭不發私書

漢董初遷廷尉卿持法清正閉門不發私書

不樂法家

唐元澹字行沖遷大理寺不樂法家因謝所居官

常在深文

漢張湯為廷尉為人多詐舞文巧詆汲黯嘗與議論湯辯常在深文小苛黯忿罵曰天下謂刀筆吏不可為公卿果然必湯也

不肯曲筆

齊游肇為廷尉卿持法以平齊宣武帝常敕肇有所降

恕聲堅執不從曰陛下自能恕之豈可令臣曲筆

聽參臯呂

晉潘岳楊荊州諫惟此大理國之憲章君蒞其任視民如傷庶獄明慎刑辟端詳聽參臯呂稱侔于張按臯臯陶呂呂侯為周司寇

時比于張

唐徐有功曰身為大理人命所懸不能順旨詭辭以求苟安時人比漢于張按于張于定國張釋之也



曲盡人情

隋楊汪為大理卿帝將親省囚徒其時計囚二百餘人  
汪通宵究審朝而奏聞曲盡人情帝甚嘉之

妄希帝意

唐高宗永徽三年梁建方等大破處月朱邪於牢山軍  
還御史劾奏建方逗遛虜得逸敕令市馬而自取駿者  
上以其有功釋不問大理卿李道裕奏請以其馬實中  
廐上曰道裕法官進馬非其本職妄希我意豈朕行事

不為臣下所信耶朕方自咎故不復黜道裕耳

安得毀法

魏志高柔為廷尉宜陽典農劉龜於禁內射兔其功曹張京言之以龜付獄帝欲釋之柔曰廷尉天下平也安得以至尊而毀法乎又晉王彪之遷廷尉時揚州刺史殷浩劾永嘉守謝毅詔付廷尉彪之執法不受詔人云張釋之以來復見此事

祇能盡心

宋至道中張泌判大理寺會鞠陳廷山謀叛獄具李潤之為大理正斷廷山謀叛當絞時中書刑房吏李文方用事潤之附會之也泌掌廷尉不預議法又不見案牘乃上疏言其事上召宰相呂蒙正責讓蒙正以文方所定為允泌因言曰臣祇能盡心于陛下不能苟容于文方以曲筆爾

不受贓錢

宋向敏中判大理寺時以沒入祖吉贓錢分賜法吏敏

中引鍾離意委珠事獨不受

不賀空獄

宋大理寺奏結獄上顧輔臣曰棘寺當得剛正如李浩者為之已而大理卿闕上曰無易李浩遂除大理卿故事寺獄空上表賀公獨不奏

論楊素專權

隋梁毗初為西寧州刺史不受蠻夷酋長遺金帝聞而善之徵為大理卿處法平允上封事極論楊素專權

言岳飛無罪

秦檜矯詔下岳飛于大理獄大理卿薛仁輔寺丞李若  
樸何彥猷皆言其無罪

雲司

唐陳子昂為司刑卿讓官表榮加天寵職察雲司必能  
利用文明哀矜庶獄

星法

天文錄平星主平天下之獄事若今廷尉之象故星讚

云平星執法正乎綱紀

大理少卿

歷代沿革後魏置少卿北齊及隋因之唐置二人宋以朝官一員兼少卿事神宗置大理獄少卿二員以蹇周輔楊汲為之分左斷刑右治獄元豐初循唐制歸百司獄于大理周輔首選為少卿建炎中興省大理卿而少卿二員如故

不自惜死

隋趙綽為大理少卿有刑部侍郎辛亶衣緋視俗云利  
官上以為厭蠱將斬之綽不奉詔上怒甚謂曰卿惜辛  
亶不自惜耶綽曰寧可殺臣不可殺辛亶至朝堂解衣  
將斬上謂綽曰意如何對曰執法一心不可惜死上拂  
衣入良久釋之時禁行惡錢有二人入市以惡錢易者  
上令斬之綽曰當杖上曰不關卿事綽曰陛下不以臣  
愚置立法司欲妄殺人豈得不關上曰撼大木不動者  
當退對曰臣冀感天心何止動木上乃止

何異登仙

唐倪若水字子泉唐開元初班景倩自揚州採訪使入  
為大理少卿過州若水餞于郊顧左右曰班生此行何  
異登仙吾恨不為僕騶未幾入為戶部

利用長者

柳子厚先友記鄭利用餘慶從父兄也真長者由大理  
少卿為御史中丞後中丞為大理卿

戴胄正人



唐太宗謂侍臣曰大理之職人命所懸當妙選正人用心存法無過戴胄者乃以為少卿

據法當徒

隋源師煬帝時為大理少卿帝出顯仁宮敕衛士不得輒離所守有一主帥私令衛士出外帝付大理師以據法當徒帝令斬之師奏曰此人罪誠難恕若陛下初使殺之自可不關文墨既付有司義歸常典或宿衛近侍更有此犯將何以加之

據法當流

唐戴胄為大理少卿參處法意至析秋毫隨類指擿言  
若湧泉帝益重之時有託資蔭冒牒取調者詔許自首  
不首罪當死俄有詐得者獄具胄以據法當流帝曰朕  
詔不首者死而今當流是示天下以不信卿賣獄耶胄  
曰法者布大信于民言乃一時喜怒所發陛下以一朝  
之忿將殺之既知不可而準于法此正忍小忿而存大  
信也帝大感悟又吏部尚書長孫無忌不解佩刀入東

上閣門封德彝以監門校尉不覺罪當死無忌罰銅二百斤曹駁曰若論其誤則為情一也而生死頓殊敢以固請上嘉之竟免校尉死

崔昇守正

唐崔昇兄元暉為宰相先是酷吏誣籍數百家元暉一開陳其枉及宋璟劾張昌宗不軌元暉頗助璟後有司正昌宗罪而元暉弟昇為司刑少卿執論大辟兄弟守正如此

有功平反

唐徐有功為少卿時周興來俊臣等羅織天下衣冠近族者數千百家有功司刑平反者不可勝紀時人方之于定國

上書諫獵

唐孫伏伽轉大理少卿太宗數出馳射上書諫曰千金之子坐不垂堂百金之子立不倚衡以此言之天下之主不可履險乘危明矣

上疏論事

唐明宗時大理少卿康澄上疏論事曰國家有不足懼者五有深可畏者六唐主優詔答之

請崇寬簡

唐韓瑗字仲良武德初為大理少卿受詔掌定律令瑗言于高祖曰官吏至公自當奉法苟若徇己豈顧刑名請從寬簡以允惟新之望高祖然之於是採定開皇律行之

號為明習

宋仁宗時陳大素權大理少卿又判大理寺號為明習  
法令

晉卿持平

宋元豐間大理丞內降公事上下皆曰是詔獄也意必  
傳置少卿韓晉卿獨持平覈實無所觀望上知其才凡  
獄難明及事繫權貴悉以委之

王表近厚

言行錄大理少卿王表多稱長者上謂宰執曰表以淳朴治獄既順人情又不慘刻張守曰表雖法科議刑頗近厚

### 大理寺正

歷代沿革正司周鄉師之屬秦置廷尉正一人漢廷尉正監及平謂之廷尉三官梁服獬豸冠銅印墨綬唐龍朔改為詳刑大夫光宅中為司刑正後復故宋神宗置大理獄後置寺正元豐五年刑部奏乞分評

事司直與正為斷司丞與長貳為議司凡斷案先上正看詳當否論難改正然後過議司復議建炎中併省其斷刑治獄寺正各置一員

決獄稱平

漢宣帝聞黃霸持法平召為寺正數決獄廷中稱平

上論見志

唐王愔為大理正奏言法令者人之隄防隄防不立則人無所禁竊見大理官員多不奉法以縱罪為寬恕以



守文為苛刻遂上應正論以見志

蘇瓊雪冤

北史蘇瓊為廷尉正時畢義雲為御史中丞以暴猛任職理官忌之莫敢有違瓊推察務在得情雪其冤者甚衆

司馬宥疑

魏志司馬芝遷大理正有盜官絹置都廁上者吏疑女工收以付獄芝曰刑罪之失失在苛暴今贓物先得而

後訊其辭若不勝掠必致誣服誣服之情不可折獄且簡而易從大人之化也今請宥所疑以隆易從之義不亦可乎太祖從其議遂釋女工

比干仁恕

漢張湯持法刻深而廷尉正何比干務仁恕數與湯爭辨所濟活者千數

顧協清嚴

南史顧協初為廷尉正冬服單薄寺卿蔡法度欲將襦

與之憚其清嚴不敢啟口

明習律令

魏橋玄奏陳琳明習律令召拜廷尉正

決定嫌疑

北史宋世軌為廷尉少卿蘇軫之為正寺中語曰決定嫌疑蘇軫之視表見裏宋世軌人以為二絕

詳正科條

六典大理正掌參議刑辟詳正科條之事凡六丞斷罪

有不當者以法正之

議典刑獄

職林初寮除葉預制議刑典獄惟明克允

大理寺丞

歷代沿革晉武帝咸寧中曹志上書請廷尉置丞隋  
改為勾檢官唐置丞六人掌分判事正刑之輕重宋  
神宗復置大理丞四員元豐五年命莫君陳等九人  
為大理寺丞始自朝廷差官也

獨存平恕

唐天后時法官競為深酷惟司刑丞徐有功杜景儉獨存平恕被告者皆曰遇來侯必死遇徐杜必生按有功文遠之孫名弘敏以字行

獨無冤濫

唐李日知遷司刑丞時用法嚴急日知獨寬平無冤濫者又胡元禮自大理丞遷少卿嘗出一死囚元禮判殺之曰元禮不離刑曹此人無活法日知報曰日知不離

刑曹此人無死法竟以兩狀申日知果直

守法原善才

唐武衛將軍權善才中郎將范懷義誤斫昭陵栢當除名高宗特命殺之大理丞狄仁傑奏罪不當死上怒令出仁傑曰張釋之有言設有盜長陵一抔土陛下何以處之今以一栢殺二將軍後代謂陛下為何如矣臣不敢奉詔者恐陷陛下于不道且羞見釋之于地下也上遂貸之

枉法黜淳于

唐李義府恃寵用事洛州婦人淳于氏美色繫大理獄  
義府屬大理丞畢正義枉法黜之將納為妾事覺義府  
逼正義自縊以滅口

蘊古上箴

唐張蘊古上大寶箴太宗嘉之賜以束帛除大理丞

延年陳策

宋天聖中大理寺丞石延年上書陳十策乞選練兵級

言西夏必叛朝廷不以為然及元昊反上思其言召見乞奉使河東籍兵回稱旨上曰知卿才久矣

### 大理評事

歷代沿革漢宣帝地節三年初於廷尉置左右評秩六百石員四人東漢光武省右評魏晉以來無左右而直謂之廷尉評隋置大理評事唐貞觀二十二年褚遂良議重法官奏置評事十員掌出使推覆後加為十二員宋熙寧置大理獄至元豐五年始命張仲



穎等十二人爲評事隆興二年詔大理事以八員爲額

馬宮高潔

漢馬宮行能高潔遷廷尉評

杜暹公清

唐杜暹授鄭縣尉以高節見知華州司馬楊孚公直士也深賞重之孚遷大理正暹坐公事下法司孚謂人曰若此尉得罪則公清之士無以勸矣特薦之執政擢大

理評事

號三緊官

西京雜記拾遺立緊評事出緊赤尉坐緊立緊者以其  
行立在北省之次獻可替否也出緊者以其銜恩按覆  
彈射不法也坐緊者以其劇縣決遣權豪畏威也故俗  
號三緊官又吏部銓注拾遺評事赤尉皆以才望清高  
標格孤秀者署為之故俗號三緊官

居九寺首

唐姚正操曰自余以評事入臺後相繼不絕韓琬以為不然自則天好法刑曹望居九寺之首以此評事多入臺迄今為雅例非正操所能升降也

無冤民

三輔決錄漢公孫弘舉何比干為廷尉右評獄無冤民人號曰何公

驚郡將

廣記王敬由為評事奉使河南叱咤風生到廣陵訪裴

謹謹曰評公使車留此一宿得無驚郡將乎

類倡優

陳舜封者舉進士為大理評事因奏事上前上見其言語捷給舉止類倡優詰之自言其父承業善箏為都知上謂宰相曰此雜類安得任清望官蓋執政不為國家區別品流所致即改授殿直

為亂首

漢涿郡太守鄭昌上宣帝書曰今明王躬垂明聽不置

廷評獄將自正若開後嗣不若刪定律令使愚人知所  
避奸吏無所弄今不正其本而置廷評以理其末恐政  
衰德怠則廷評將招權而為亂首矣

註誤悉免

唐新語敬昭道為評事時沂州反者註誤坐者四百餘  
人昭道反覆詰對執政無以奪註誤者悉免

贊佐有勞

唐柳宗元裴評事墓誌大理裴伯言長子某射進士策

進大理評事當伐蔡及鄆汴某嘗為軍首贊佐有勞元和十四年終于河南

不讀律

唐張鷟車載斗量詩評事不讀律博士不尋章

未登朝

韓愈送評事崔立之詩勿嫌法官未登朝猶勝赤尉長趨尹

鴻臚卿

歷代沿革周禮大行人掌賓客及諸侯朝覲之事即其任也秦置典客掌諸侯及歸義蠻夷漢因之景帝更名大行令武帝改曰大鴻臚東漢又曰鴻臚至梁曰鴻臚卿除大字後魏又加大字北齊又除之至唐龍朔二年改為司文卿光宅初改曰司賓卿按胡廣曰鴻聲也臚傳也所以傳聲贊導九賓也韋昭曰鴻大也臚其陳序也欲以大禮陳序于賓客也

掌印綬

漢書典客秦官秩中二千石掌諸侯及四方歸義蠻夷  
皇子拜授印綬之事

主齋祠

東觀漢記大鴻臚漢舊官也建武元年復置屬官大行  
丞一人大行丞有理禮員四十七人主齋祠擯贊九賓  
之禮

遷公

東觀漢記鴻臚三十六人其陳寵左雄朱寵龐參施延



竝遷公

慙長

謝承後漢書陳紀字元方遭父太丘長寔憂嘔血絕氣  
劉豫州嘉其至行上表圖畫以勵風俗袁紹欲以太尉  
讓紀紀不受拜大鴻臚卒于官子羣為三公天下以為  
公慙卿卿慙長

韓暨宿德

魏略韓宣字景然為大鴻臚初南陽曲阜韓暨以德在

宣前為大鴻臚及宣在官亦稱職故鴻臚中為之語曰  
大鴻臚小鴻臚前後治行亦相如

刁攸能人

晉山濤啟事鴻臚主故事前後為之者多不善了今缺  
當選御史中丞刁攸舊能人不審可爾否

司農卿

歷代沿革初秦置理粟內史掌穀貨漢景帝更名大  
農令武帝更名大司農王莽改大司農曰羲和後又

改為納言東漢復為大司農梁曰司農卿又曰春卿  
後魏又加大字北齊又除唐龍朔二年改曰司稼卿  
咸亨元年復舊宋朝司農寺判寺事二人以兩制或  
朝官以上充元豐官制行寺監不治外事遂循唐典  
正其職秩司農舊職悉歸戶部右曹唯常平免役新  
法與夫農田水利則隸司農也

### 天倉

韓楊天文要集天倉者大司農也

國泉

史游急就篇司農少府國之泉也

司金

揚雄大司農箴維時大農爰司金穀

盜錢

漢田延年為大司農坐盜都內錢三十萬自殺

居處節儉

漢朱邑宣帝時為北海太守以治行第一人為大司農

身為列卿居處節儉祿賜以供族黨家無餘財

學問博通

東漢王孫端學問博通為大司農

陳寵風聲

漢陳寵為廣漢太守風聲大行入為大司農

鄭眾清正

東漢鄭眾為大司農以清正稱

行不賞糧

漢鄭當時為大司農門下客無貴賤無留門者山東諸公翕然稱鄭莊武帝曰吾聞莊行千里不賁糧

口不言貨

白氏六帖晉崔洪字良伯為司農手不執珠玉口不言貨財會汝南王亮集公卿宴以琉璃鍾行酒酒至洪洪不執

非德不交

東漢趙典字仲經為大司農閉門却掃非德不交

非儒不選

唐元稹行裴司農制農天下之本也故國有九列而司農居其一焉前代非牟融之循理康成之儒學不在茲選注云漢鄭玄字康成以公車徵為大司農給安車一乘所過長吏迎送牟融事見下

以儒學徵

東漢高詡字季回以儒學徵拜大司農在朝以清白方正稱

以政治召

魏梁習字子虞為并州二十年政治為天下最召拜大司農

耿國曉邊事

續漢書耿國字叔慮為大司農曉邊事能議論數上便宜事天子器之

元倂納郡租

趙元倂轉潁川太守有惠政因入朝會司農不時納郡



租元倣奏之于帝曰如臣意未過十日帝即日拜元倣為司農卿納天下郡租如言而了帝悅

印符追兵

唐司農卿段秀實與將軍劉海濱涇原將吏何明禮岐靈岳謀誅朱泚迎乘輿未發泚遣韓旻將銳兵三千聲言迎駕實襲奉天秀實謂靈岳曰事急矣使靈岳竊姚令言印令旻且還竊其印未至秀實倒用司農印印符追之旻得符而還秀實謂同謀曰旻來吾屬無類矣我

當直搏泚殺之不克則死終不能為之臣也旻至泚與  
令言大驚靈岳獨承其罪而死

取錢納帑

唐杜中立遷司農卿初度支將六宮殮錢移于司農每  
季一出付吏大吏盡舉所給于人權其子錢以給之既  
不以時以致黃門來督責謾罵中立取錢納帑舍率五  
百一出吏不得為奸遂以為法

稱為名卿

東觀漢記牟融字子優為大司農性明達稱為名卿

號為走卿

宋張維司農寺壁記今倣周制為六部以戶部掌國計而司農猶為列卿贅矣況倉儲出納自昔太倉令主之蓋大司農之屬猶今之倉部也以列卿而行太倉令日惟倉部之約束是聽位雖高勢出倉部下至於軍餉給發疲於奔命世號為走卿辱矣維下走也不敢謂辱而惟贅是羞

司農少卿

歷代沿革後魏北齊司農寺置少卿隋唐因之宋元豐正名置少卿為卿之貳建炎三年省之紹聖四年復置司農卿少卿各一員

賜絹

唐韋弘機拜司農少卿受詔檢校東都營田苑囿之事有官者于苑中犯法弘機杖之然後奏之高宗嗟賞以為能賜絹數十匹曰更有犯者卿即杖之不必奏也

# 貯錢

唐高宗謂韋弘機曰宮館隋代所造漸將摧毀頻欲修葺又費財力如之何弘機奏曰臣任司農向已十年前後省費今見貯錢三十萬貫可以供葺理上大悅

## 士人除授

宋莫濟自禮部員外郎除司農少卿魏杞奏曰濟嘗中詞科且掌南宮牋奏恐議者以為蹊徑未退上曰中都官不分清濁如司農責任亦甚重以士人除授亦無害

也濟尋奏久任責實詔曰所論甚當

主上親擢

宋高夔字仲一上親自擢為司農少卿時倉地卑下夔始用板米以是不腐

擢貳農正

曲阜行韓正彥制擢貳農正

議虧軍實

言行錄李浩除司農少卿時朝廷和糴八百萬石而董

事者皆有憑恃賤糴濕惡以欺沒官錢戶部不敢詰公  
視事即奏請下有司治大理附會戶部以支為盤公力  
爭曰是非徒惠姦且虧軍食上是其議

司農寺丞

歷代沿革秦治粟內史有兩丞漢司農丞亦二人或  
謂之中丞東漢司農丞一人魏晉因之銅印黃綬進  
賢一梁冠宋齊以墨綬唐有丞六人宋行新法始置  
司農丞一員熙寧五年增置丞四員元豐四年止留

丞一員次年改制以司農舊職悉付戶部右曹而始循唐典正其秩職

省轉運

通典漢耿壽昌為大司農中丞奏設常平倉給北邊省轉運又桑弘羊為大司農中丞管諸會計事

勸農桑

漢平帝置大司農部丞十三人人部一州勸農桑

供國用



唐置丞六人掌判寺事凡天下租稅及折造轉運于京師皆閱而納之以供國用以祿百官

參寺事

四朝志少卿為卿貳而丞則參領寺事

檄奏詳明

東都事略宋熊本判司農寺丞神宗曰熊本不傷財不害民一旦去百年之患檄奏詳明可嘉也

德性嚴恕

宋楊誠齋集葉顥字子昂謚正簡遷司農寺丞在朝三年非公事未嘗至相府樞密王綸知公恬退而未知其德性欲試以事一日官誥院失錦一端命公治之公請寬其謾藏之罪於是綸大喜謂其客曰葉寺丞介而通嚴而恕真重器也

太府卿

歷代沿革周禮天官之屬有太府下大夫掌貢賦受其貨賄之入即其任也秦漢以下不置其職務所司

分在司農少府至梁始置太府卿陳及後魏北齊隋  
皆因之唐龍朔二年改為外府卿咸亨初復舊武后  
光宅初改為司府卿神龍初復舊宋朝太府寺判寺  
事一人以兩制或帶職朝官充凡財貨廩藏貿易四  
方貢賦百官俸秩皆隸三司本司但掌供祠祭香幣  
悅巾神位及造斗秤升尺而已元豐官制行始正職  
掌

受貨賄

周禮天官太府掌九貢九賦九功之貳以受其貨賄之  
入頒其貨于受藏之府頒其賄于受用之府

居監臨

白六帖居監臨之官典出入之務

知出納

唐楊崇禮開元時為太府少卿雖錢帛充牣丈尺皆躬  
自省閱前後為少卿者無與為比擢拜太府卿時太平  
日久御府財物山積時論以為凡經楊卿者無不精好

後崇禮罷太府玄宗訪其諸子可代父任者宰相以謹  
餘謹矜謹名皆得父清白帝擢謹矜為監察御史知太  
府出納又南豐集財賦總于地官而太府司其出納

領貢獻

六帖領貢獻于四方掌財用于五庫

按度程

白集裴武除制聚九州之賦辦百貨之名按其度程謹  
其出納孰為主者外府上卿

賜金紫

唐楊國忠判度支玄宗觀左藏庫喜其貨幣山積而賜國忠金紫權太府卿國忠專錢穀之任出入禁中日加親幸

襲譽威肅

唐李襲譽召為太府卿為人嚴慤在位以威肅聞

蔡議公勤

六帖漢用公勤任先蔡議魏惟清白選在常林

太府少卿

歷代沿革後魏孝文帝改少府為太府置少卿一人  
北齊因之隋煬帝加至二人唐減一人貞觀中復舊  
龍朔咸亨光宅神龍並隨曹改復宋太府寺置同判  
寺一人以京朝官充元豐正名置少卿一人以為卿  
貳元祐三年詔太府長貳並置餘則否

孫詔節

北史後魏孫詔為司府少卿帝問卿何年老對曰臣年

雖老臣節尚少

思盾筆

唐書尹思盾為司府少卿時侯知一亦厲威嚴吏人為之語曰不畏侯卿杖惟畏尹卿筆

山堂肆考卷五十二